

# Blagèèri



## e VSG Bängg

E Task force brucht me vilicht au zwai  
Mit Masterplan und Mailestai  
Pro Wuche dien si 10 Stund Sitze  
Si grible, rächne, schwätze und schwitze  
Si raise um d Wält luege obe und unde  
Und häen no kai Darm fyr e Glepfer gfunde.

De Schwobe duet d Finanzlag stingge  
Si wänn uns mit dr Peitsche wingge  
Dr Steibrück merggt in dr Wulle nit  
Es verschwindet nit s Gäld s göhn jo (au) d'Litt  
Die Schwobe wo könne läse und schriebe  
Kömme in d Schwitz und möchte do bliibe

Mit de Schnitzelbängg stohts z'Basel schints miis  
Vill zwenig Bängg geen an Schnaabelpryys  
Mit Hilf vo Uni Professore  
duet der Schwitzer Karli nach dr Ursach boore  
Der Grund isch klaar es waiss es jedes Kind  
S isch will d Striggede jedes Joor gwinnt.

Z Basel und in Züri also uff der ganze Wält  
Dien alli joomere si hän kai Gäld  
D Roche duet drum uf de Duurm verzichte  
Bi dr UBS muess es der Merz go richte  
Nume die Gselle bi der IWB  
Risse Feschter wie wenn nyyt wär gschee.

Es het gharzt mit Schmid und Widmer Schlumpf  
D Schwiitz versinggt imene dieffe Sumpf  
D Rettig isch doo fascht es bitzeli z spoot  
dr UELI isch ändlig im Bundesroot  
Si Rüstigskonzäpt kasch nume beduuure(re)  
Um d'Schwitz ume will är e Muure Muurere

Bim FCB lauft in der Tschämpionslig schlächt  
Ganz Basel isch suur em Gross ischs rächt  
Will sini Helde kaini Gol mee dien schiesse  
Isch fertig mit jufle är duet s Läbe jetz gniesse  
Jetzt kaa är Zyt bim Gigi nutze  
Zum Rase maie und s Schwimmbad putze

Willsch mit em Auti z Oobe schnäll hei  
Kriegsch an de Ample scho Gallestei  
An de Kreisel stockts so witt du magsch see  
Bi dr MFK kaasch nymme mee  
Du drambsch uffs Gas fliegst in Mc Donalds Garte  
So muesch im Drive-in gar nym lang warte

Dr Näf haut sini Fryndin in d Pfanne  
Bim VBS het das schints kaine gspanne  
Zletscht aber het me ihn usegschosse  
Was sell ich jetz mache hyylt är verdrosse  
anderst bim Ospel sit är s Gäld nimm mues zelle  
Het är Zyt und Lust zum Goofe ufstelle.

Im Bus am Morg isch e riise Radau  
Zmitz drin hoggsch du und ergerisch di blau  
Au z Nacht in dr Staine dien sie dir nit schängge  
Sie suffe und lärme bim umehänge  
Und s diggschte isch me will d Eltere stroofe  
Wenn si ändlige still in Schuel dien schloofe